

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2010-mik, ataani allassimasutut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut, kaammattuutit aalajangersagaq imatut oqaasertaqarpoq:

Nunat Avannarliit Killiit Siunnersuisoqatigiiffiata Savalimmiuni naalakkersuisut, Namminersorlutik Oqartussat Islandimilu naalakkersuisut kaammattorpai "Nunat Avannarliit Killiit oqaluttuarisaanerat inuiaqatigiillu pillugit sullissivik"-mik pilersitsinissamut aningaasanut inatsisini aningaasanik qinnuteqaqqullugit taperseeqqullugillu.

(Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuat, Josef Motzfeldt)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2010-mik, ataani allassimasutut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuummut imaattumut Naalakkersuisut qujapput:

Nunat Avannarliit Killiit Siunnersuisoqatigiiffiata Savalimmiuni naalakkersuisut, Namminersorlutik Oqartussat Islandimilu naalakkersuisut kaammattorpai "Nunat Avannarliit Killiit oqaluttuarisaanerat inuiaqatigiillu pillugit sullissivik"-mik pilersitsinissamut aningaasanut inatsisini aningaasanik qinnuteqaqqullugit taperseeqqullugillu.

Nunani avannarlerni killerni suleqatigiinnerup tunngavissilluarneqarnerunissaa Naalakkersuisut isumaqatigaat, tamatumani Nunani Avannarlerni Killerni innuttaasut pisimasut assigiissutigineqartut pillugit paasissutissinneqarsinnaatitaassallutik, sumiiffimmi ineriartornerup ilivitsutut paasinissaanut, kiisalu tamanna nunat pineqartut inissisimanerannik erseqqissaaviunerusinnaalluni.

Nunat avannarliit killiit ukiuni akullernili kulturikkut niuernikkullu europamiut, qallunaatsiaat inuillu akornanni naapiffiusarsimapput. Savalimmiut, Kalaallit Nunaat Islandilu assigiittorujussuarmik oqaluttuassartaqarput ukiunilu untritilikkuutaani Atlantikup Avannaani eqqaamioriit taakku akornanni attaveqartoqartarsimavoq ukiuni kingullerni maanna nunat avannarliit nunallu avannarliit killiit siunnersuisoqatigiivi, ataatsimiititaliat, allallu inuussutissarsiornermut, kultureqarnermut, ilinniartitaanermut ilisimatusarnermullu tunngasut allat aqqutigalugit nukittorsarneqarlunilu pisortatigoortunngortinneqarsimasumik. Taamaattumik nunat pineqartut oqaluttuarisaaneri kisiisa pinnagit aammali eqqaamiorisat oqaluttuassartaat pillugit tunuliaqutaasut ilisimanissaat pingaaruteqarpoq.

Taamaakkaluartoq Naalakkersuisut nalilerpaat, maannakkut aningaasaqarnikkut killissarititaasut tunngavigalugit periarfissaqassanngitsoq siunnersuut tapersissallugu.

Taamatut oqaaseqarlutik Naalakkersuisut siunnersuutip akuerineqannginnissaa inassutigaa.